

**საქართველოს კანონი**  
**„ადრეული და სკოლამდელი აღზრდისა და განათლების შესახებ“ საქართველოს კანონში**  
**ცვლილებების შეტანის თაობაზე**

**მუხლი 1.** „ადრეული და სკოლამდელი აღზრდისა და განათლების შესახებ“ საქართველოს კანონის (საქართველოს საკანონმდებლო მაცნე ([www.matsne.gov.ge](http://www.matsne.gov.ge)), 24.06.2016, სარეგისტრაციო კოდი: 430040000.05.001.018169) 28-ე მუხლის:

**1. მე-6 და მე-7 პუნქტები ჩამოყალიბდეს შემდეგი რედაქციით:**

„6. დაწესებულებების ავტორიზაციის მიზნით, გარდამავალ პერიოდად განისაზღვროს ვადა 2030 წლის 1 იანვრამდე.

7. გარდამავალ პერიოდში დაწესებულებების ავტორიზაციას ახორციელებს სსიპ - განათლების ხარისხის განვითარების ეროვნული ცენტრი.

**2. მე-7 პუნქტის შემდგომ დაემატოს შემდეგი შინაარსის 8 – 23 პუნქტები:**

„8. გარდამავალ პერიოდში, არაუგვიანეს 2022 წლის 1 დეკემბრისა, საქართველოს განათლებისა და მეცნიერების სამინისტროს წარდგინებით, საქართველოს მთავრობის დადგენილებით, მტკიცდება დაწესებულებების ავტორიზაციის, აგრეთვე, დაწესებულების ავტორიზაციის შეჩერებისა და შეწყვეტის დროებითი წესი და პროცედურები (შემდგომში - დროებითი წესი).

9. გარდამავალ პერიოდში დაწესებულებების ავტორიზაციის პროცესის განხორციელების მიზნით:

ა) არაუგვიანეს 2022 წლის 1 ივლისისა, სსიპ - განათლების მართვის საინფორმაციო სისტემის მიერ იქმნება შესაბამისი ელექტრონული სისტემა დაწესებულებათა პირველადი რეგისტრაციის მიზნით (შემდგომში - რეგისტრაციის ელექტრონული სისტემა);

ბ) დაწესებულება, რომელიც 2022 წლის 1 ივლისამდე საქმიანობს ადრეული აღზრდისა და განათლების დაწესებულების ან/და სკოლამდელი აღზრდისა და განათლების დაწესებულების სახით და რომელსაც სურს ადრეული აღზრდისა და განათლების დაწესებულების ან/და სკოლამდელი აღზრდისა და განათლების დაწესებულების სტატუსის მოპოვება, ვალდებულია, 2022 წლის 1 ივლისიდან არაუგვიანეს 2023 წლის 1 იანვრამდე, გაიაროს რეგისტრაცია რეგისტრაციის ელექტრონულ სისტემაში;

გ) არაუგვიანეს 2024 წლის 1 იანვრისა, ამ პუნქტის „ბ“ ქვეპუნქტის შესაბამისად რეგისტრირებული დაწესებულებები ვალდებული არიან სსიპ - განათლების ხარისხის განვითარების ეროვნული ცენტრში წარადგინონ თვითშეფასება დროებითი წესის შესაბამისად;

დ) ამ პუნქტის „გ“ ქვეპუნქტით წარდგენილი თვითშეფასებების ანალიზის საფუძველზე, სსიპ - განათლების ხარისხის განვითარების ეროვნული ცენტრის წინადადების საფუძველზე, არაუგვიანეს 2024 წლის 1 ოქტომბრისა, საქართველოს განათლებისა და მეცნიერების მინისტრის ბრძანებით მტკიცდება ამ პუნქტის „ბ“ ქვეპუნქტის შესაბამისად, რეგისტრირებული დაწესებულებების ავტორიზაციის გავლის განრიგი.

10. ამ მუხლის მე-9 პუნქტის „ა“ პუნქტით გათვალისწინებული რეგისტრაციის ელექტრონული სისტემის წარმოების წესი მტკიცდება საქართველოს მთავრობის დადგენილებით.

11. ამ მუხლის მე-9 პუნქტის „ბ“ ქვეპუნქტით გათვალისწინებულ რეგისტრაციის ელექტრონულ სისტემაში რეგისტრაცია ჩაითვალოს შესაბამისი დაწესებულების მიერ ადრეული ან/და სკოლამდელი აღზრდისა და განათლების მიმართულებით საქმიანობის უფლების საფუძვლად, შესაბამისი დაწესებულების მიერ, ამ მუხლის მე-9 პუნქტის „დ“ ქვეპუნქტით გათვალისწინებული ავტორიზაციის გავლის განრიგის გათვალისწინებით, შესაბამისი გადაწყვეტილების მიღებამდე.

12. დაწესებულება, რომელიც ამ მუხლის მე-9 პუნქტის „გ“ ქვეპუნქტით გათვალისწინებულ ვადაში არ წარადგენს თვითშეფასებას ან ამავე პუნქტის „დ“ ქვეპუნქტის შესაბამისად დადგენილ ვადაში არ წარადგენს ავტორიზაციის განაცხადს, უუქმდება ადრეული ან/და სკოლამდელი აღზრდისა და განათლების მიმართულებით საქმიანობის უფლება.

13. დაწესებულება, რომელიც 2022 წლის 1 ივლისამდე არ საქმიანობდა ადრეული ან/და სკოლამდელი აღზრდისა და განათლების დაწესებულების სახით და სურს ადრეული აღზრდისა და განათლების დაწესებულების ან/და სკოლამდელი აღზრდისა და განათლების დაწესებულების სტატუსის მოპოვება, გარდამავალ პერიოდში, ავტორიზაციის პროცედურას გაივლის დროებითი წესის შესაბამისად. იგივე წესი ვრცელდება, გარდამავალ პერიოდში, დაწესებულების მიერ ხელახალი განაცხადის (ავტორიზაციაზე უარის თქმის შემთხვევაში) ან ახალი განაცხადის (დამატებით, ადრეული აღზრდისა და განათლების დაწესებულების ან სკოლამდელი აღზრდისა და განათლების დაწესებულების სტატუსის მოპოვების სურვილი) წარდგენის ან ამ მუხლის მე-12 პუნქტით განსაზღვრულ შემთხვევებში საქმიანობის უფლების გაუქმების შემთხვევაშიც.

14. გარდამავალ პერიოდში, დაწესებულებების ავტორიზაციის შესახებ გადაწყვეტილებას იღებს ადრეული და სკოლამდელი აღზრდისა და განათლების დაწესებულებების ავტორიზაციის საბჭო (შემდგომში – ავტორიზაციის საბჭო). ავტორიზაციის საბჭოს წევრებს საქართველოს განათლებისა და მეცნიერების სამინისტროს წარდგინებით ნიშნავს და ათავისუფლებს საქართველოს პრემიერ-მინისტრი. ავტორიზაციის საბჭოს საქმიანობა არ არის ანაზღაურებადი. ავტორიზაციის საბჭოს უფლებამოსილებანი და საქმიანობის წესი განისაზღვრება დროებითი წესით.

15. ავტორიზაციის საბჭო, დროებითი წესის შესაბამისად, იღებს ერთ-ერთ შემდეგ გადაწყვეტილებას:

- ა) ავტორიზაციის მინიჭების შესახებ;
- ბ) ავტორიზაციაზე უარის თქმის შესახებ;
- გ) ავტორიზაციის შეწყვეტის შესახებ;
- დ) ავტორიზაციის შეჩერების შესახებ.

16. ავტორიზაციის სტანდარტებით დადგენილ მოთხოვნებთან დაწესებულების შესაბამისობა დგინდება დროებითი წესით.

17. საქმიანობის უფლების გაუქმების შემთხვევაში ან ავტორიზაციაზე უარის თქმის/ავტორიზაციის შეწყვეტის შესახებ გადაწყვეტილების მიღების შემთხვევაში, იურიდიული პირი უფლებამოსილია, ცენტრს საავტორიზაციო განაცხადი წარუდგინოს საქმიანობის უფლების გაუქმების თარიღიდან ან ავტორიზაციაზე უარის თქმის/ავტორიზაციის შეწყვეტის შესახებ გადაწყვეტილების მიღებიდან 1 წლის შემდეგ.

18. ავტორიზაციის მინიჭების შესახებ ან ავტორიზაციაზე უარის თქმის შესახებ გადაწყვეტილება მიიღება დაწესებულების მიერ საავტორიზაციო განაცხადის წარდგენიდან 180 კალენდარული დღის განმავლობაში.

19. გარდამავალ პერიოდში, ავტორიზებულ დაწესებულებებთან მიმართებით, სსიპ - განათლების ხარისხის განვითარების ეროვნული ცენტრი უზრუნველყოფს ადრეული ან/და სკოლამდელი აღზრდისა და განათლების მომსახურების ავტორიზაციის სტანდარტებთან შესაბამისობის დასადგენად მონიტორინგს, დროებითი წესის შესაბამისად. სსიპ - განათლების ხარისხის განვითარების ეროვნული ცენტრი, გარდამავალ პერიოდში, ასევე, ვალდებულია, დაწესებულების საადმინისტრაციო-საგანმანათლებლო პროგრამაში ჩართული არანაკლებ 10 ბავშვის მშობლების/კანონიერი წარმომადგენლების მოთხოვნით განახორციელოს ამ დაწესებულების მონიტორინგი.

20. დაწესებულებებზე ამ კანონით გათვალისწინებული კონტროლის განმახორციელებელი ორგანო(ებ)ი ვალდებული არიან კონტროლის შედეგების შესახებ ინფორმაცია, გარდა ამ კანონის 26-ე მუხლის მე-3 პუნქტით გათვალისწინებული ღონისძიებებისა, აცნობონ სსიპ - განათლების ხარისხის განვითარების ეროვნულ ცენტრს, რომელიც უფლებამოსილია აღნიშნულის საფუძველზე განახორციელოს დაწესებულების მონიტორინგი.

21. ავტორიზაციის შეწყვეტის ან ავტორიზაციის შეჩერების შესახებ გადაწყვეტილება მიიღება დაწესებულების მიერ ავტორიზაციის პირობების შესრულების შემოწმების შესახებ სსიპ - განათლების ხარისხის განვითარების ეროვნული ცენტრის დირექტორის ბრძანების გამოცემიდან 90 კალენდარული დღის განმავლობაში. ამ ვადის დინება შეჩერებულად ითვლება ავტორიზაციის საბჭოს მიერ შესაბამისი დაწესებულებისათვის ხარვეზის გამოსასწორებლად განსაზღვრული ვადის განმავლობაში.

22. გარდამავალ პერიოდში, სსიპ - განათლების მართვის საინფორმაციო სისტემა ვალდებულია, საქართველოს მთავრობის მიერ დამტკიცებული „ადრეული და სკოლამდელი აღზრდისა და განათლების დროებითი მართვის საინფორმაციო სისტემის წესის“ შესაბამისად, უზრუნველყოს, ადრეული და სკოლამდელი აღზრდისა და განათლების დროებითი მართვის საინფორმაციო სისტემის ადმინისტრირება და აღნიშნულ სისტემაში მუნიციპალიტეტებისა და სსიპ - განათლების ხარისხის განვითარების ეროვნული ცენტრის წვდომა.

23. მუნიციპალიტეტი ვალდებულია, უზრუნველყოს ამ მუხლის 21-ე პუნქტის შესაბამისად, ადრეული და სკოლამდელი აღზრდისა და განათლების დროებითი მართვის საინფორმაციო სისტემიდან მიღებულ მონაცემთა საჯაროობა, ასევე, უზრუნველყოს მონაცემთა ხელმისაწვდომობა სსიპ - საქართველოს სტატისტიკის ეროვნული სამსახურისთვის.

24. გარდამავალ პერიოდში დაწესებულების ავტორიზაციის გავლის შემდეგ, შესაბამისი დაწესებულებისათვის აითვლება ამავე კანონის მე-16 მუხლით გათვალისწინებული 4-წლიანი ვადა.

25. გარდამავალ პერიოდში, დროებით წესში შესაძლოა, დადგინდეს ამ კანონის 22-ე მუხლით განსაზღვრულისგან განსხვავებული თანაფარდობა.

## **მუხლი 2.**

1. ამ კანონის ამოქმედებიდან გარდამავალ პერიოდში:

ა) საქართველოს განათლებისა და მეცნიერების სამინისტრომ უზრუნველყოს დაწესებულებების მიერ საქართველოს შესაბამისი კანონმდებლობის მოთხოვნებთან თავსებადობის ეტაპობრივად მისაღწევად სათანადო ღონისძიებების განხორციელება;

ბ) მუნიციპალიტეტებმა უზრუნველყონ შესაბამისი ღონისძიებების განხორციელება მათ ტერიტორიაზე მოქმედი დაწესებულებების მიერ საქართველოს შესაბამისი კანონმდებლობით განსაზღვრულ მოთხოვნებთან თავსებადობის ეტაპობრივად მისაღწევად;

გ) დაწესებულებებმა უზრუნველყონ შესაბამისი ღონისძიებების განხორციელება საქართველოს შესაბამისი კანონმდებლობით განსაზღვრულ მოთხოვნებთან თავსებადობის ეტაპობრივად მისაღწევად;

დ) სსიპ - განათლების ხარისხის განვითარების ეროვნულმა ცენტრმა, გარდამავალ პერიოდში, უზრუნველყოს დაწესებულებების ეტაპობრივი ავტორიზაცია;

ე) საქართველოს განათლებისა და მეცნიერების სამინისტრომ და სსიპ - განათლების ხარისხის განვითარების ეროვნულმა ცენტრმა ამ მუხლით განსაზღვრული უფლებამოსილებების განხორციელების დროს უზრუნველყონ მუნიციპალიტეტის მერიის შესაბამისი სტრუქტურული ერთეულების ან/და არასამეწარმეო (არაკომერციული) იურიდიული პირის წარმომადგენლების ჩართულობა, მუნიციპალიტეტის ტერიტორიაზე მდებარე ადრეული და სკოლამდელი აღზრდისა და განათლების დაწესებულებების ავტორიზაციის, აგრეთვე, დაწესებულების ავტორიზაციის შეჩერებისა და შეწყვეტის დროებითი წესისა და პროცედურების შესაბამისად;

ვ) მუნიციპალიტეტი ვალდებულია, მუნიციპალიტეტის მერიის შესაბამისი სტრუქტურული ერთეულების ან/და არასამეწარმეო (არაკომერციული) იურიდიული პირის წარმომადგენლების მეშვეობით ჩაერთოს საქართველოს განათლებისა და მეცნიერების სამინისტროსა და სსიპ - განათლების ხარისხის განვითარების ეროვნული ცენტრის მიერ ამ მუხლით განსაზღვრული უფლებამოსილებების განხორციელებისას.

2. საქართველოს განათლებისა და მეცნიერების სამინისტრო ვალდებულია საქართველოს მთავრობას დასამტკიცებლად წარუდგინოს „ადრეული და სკოლამდელი აღზრდისა და განათლების დროებითი მართვის საინფორმაციო სისტემის წესი“ არაუგვიანეს 2023 წლის 1 იანვრისა.

3. მუნიციპალიტეტების საკრებულოებმა უზრუნველყონ „ადრეული და სკოლამდელი აღზრდისა და განათლების შესახებ“ საქართველოს კანონით გათვალისწინებული სამართლებრივი აქტების მიღება.

### **მუხლი 3.**

ეს კანონი ამოქმედდეს გამოქვეყნებისთანავე.

საქართველოს პრეზიდენტი

სალომე ზურაბიშვილი